



Broj: 01-33-17689-1/26
Zenica, 19.09.2026. godine

SAOPĆENJE ZA JAVNOST

**Zavod zdravstvenog osiguranja Zeničko-dobojskog kantona ponovo omogućio ovjeru
knjižica rudarima: Ne želimo biti dio političkih prepucavanja**

Pitanje zdravstvenog osiguranja rudara posljednjih dana sve više se pokušava pretvoriti u političko pitanje. Zavod zdravstvenog osiguranja Zeničko-dobojskog kantona ne želi da rudari budu uvučeni u politička prepucavanja niti da posljedice neriješenih odnosa i neizmirenih obaveza budu prebačene na njihova leđa.

O ovom problemu pokušavali smo razgovarati i tražiti rješenje mnogo prije nego što je pitanje zdravstvenog osiguranja rudara postalo tema javnih i političkih rasprava. Na inicijativu Zavoda otvoreni su razgovori sa predstavnicima Vlade Federacije BiH, Elektroprivrede BiH i rudnika, tražeći konkretno rješenje. Nažalost, ti razgovori nisu rezultirali konkretnim korakom prema rješavanju doprinosa za zdravstveno osiguranje rudnika.

U posljednjem razgovoru, koji sam imao u četvrtak navečer sa federalnim ministrom energije, rudarstva i industrije Vedranom Lakićem, ponovo sam tražio da se pronade barem minimalno rješenje kako rudari ne bi ispaštali zbog dugogodišnjih neizmirenih obaveza. Ni tada nije ponuđen konkretan prijedlog za rješavanje zdravstvenog osiguranja rudara.

Zato smo odlučili da, iz poštovanja prema rudarima i njihovim porodicama, ponovo omogućimo ovjeru zdravstvenih knjižica rudarima. Ne želimo da zdravstvena zaštita ljudi koji su svoj radni vijek proveli u rudnicima bude sredstvo političkog pritiska.

Istovremeno, uzrok problema mora biti jasno imenovan. Neizmirene obaveze rudnika sa područja Zeničko-dobojskog kantona prema Zavodu zdravstvenog osiguranja Zeničko-dobojskog kantona iznose više od 175 miliona KM.

Naš cilj nije dodatno opteretiti rudnike niti pogoršati položaj rudara. Želimo da se problem riješi tako da se zaštite rudari, osigura održivost rudnika i poštuju zakonske obaveze prema zdravstvenom sistemu.

Zato od Vlade Federacije BiH tražimo konkretan potez: da otvori postupak za sistemsko rješavanje dugovanja rudnika prema zdravstvenim zavodima, utvrdi način i izvore finansiranja, te donese jasan plan sa rokovima. Ne tražimo da se odmah riješi svih 175 miliona KM. Tražimo da se konačno napravi prvi konkretan korak i da se počne rješavati problem koji godinama raste.

Zenica, dr. A.A Borića 28B, tel: +387 32 466 285, fax: +387 32 466 282,
Depozitni račun - KM: ASA Banka D.D. Sarajevo 1340100000002157, Regist. kod: Kantonalni sud Zenica pod brojem U/I-1081,
ID PU : 4218306150006,

Poslovnice ZZO:

Breza, Zavnobih-a 2 Tel: 032 789 180
Doboj-Jug, Matuzići bb Tel: 032 699 111
Kakanj, Alije Izetbegovića 50 Tel: 032 557 820
Maglaj, Ilijasa Smajlagića bb Tel: 032 609 151
Olovo, Branilaca Olova bb Tel: 032 828 050
Tešanj, Braće Pobrić bb Tel: 032 656 200

Zavidovići, Branilaca grada bb
Zenica, dr. A.Aska Borića 28b
Žepče, Ulica prva
Usora, Srednja Omanjska bb
Vareš, Zvijezda 6
Visoko, Branilaca Bosne 11

Tel: 032 877 767
Tel: 032 466 261
Tel: 032 880 606
Tel: 032 895 257
Tel: 032 849 070
Tel: 032 731 151

Posebno očekujemo da se preispitaju i odluke kojima se prilikom penzionisanja rudara ne rješavaju istovremeno i njihove obaveze prema zdravstvenom osiguranju. Ako se za rudare pronalazi način da im se uveže staž i omogući penzionisanje, onda se mora pronaći i način da se riješi njihov status u obaveznom zdravstvenom osiguranju.

Više od 175 miliona KM neizmirenih obaveza predstavlja i značajan prostor za dodatno unapređenje zdravstvene zaštite građana ZDK – od lijekova i terapija, preko savremene dijagnostike i medicinske opreme, do ulaganja u zdravstvene ustanove i kvalitet usluga za pacijente.

Zavod zdravstvenog osiguranja Zeničko-dobojskog kantona nije vlasnik rudnika, ne upravlja njihovim poslovanjem i ne donosi odluke o njihovoj finansijskoj politici. Naša odgovornost je zdravstvena zaštita građana.

Mi nismo protiv rudara. Mi smo uz rudare. Ali odgovornost za sistemski problem mora biti tamo gdje i pripada.

Zavod zdravstvenog osiguranja Zeničko-dobojskog kantona će učiniti svoj dio i omogućiti rudarima ovjeru zdravstvenih knjižica. Sada očekujemo da Vlada Federacije BiH učini svoj dio – da umjesto novih odgađanja ponudi konkretan plan, osigura početna sredstva i utvrdi rokove za rješavanje dugovanja.

Rudari ne smiju biti žrtve političkih prepucavanja. Njihova zdravstvena zaštita ne smije biti predmet političkog nadmudrivanja. Vrijeme je za konkretno rješenje.

DOSTAVLJENO:

1 x mediji (putem e-mail)

1 x a/a

